

NOTA DE PRENSA

As Xornadas de Psicoloxía e Saúde do Colexio profesional galego chegan á súa vixésimo terceira edición e celebraranse entre o 23 e o 24 de novembro na localidade ourensá

A tecnoloxía e os retos do mundo dixital reúnen a un cento de profesionais da psicoloxía no Carballiño

Santiago de Compostela, 15 de novembro de 2018.- O próximo venres, 23 de novembro, dará comezo a vixésimo terceira edición das **Xornadas da Sección de Psicoloxía e Saúde** que neste ocasión se centran nas tecnoloxías emerxentes e nos retos que supón unha contorna dixital para a psicoloxía. Será a primeira vez que este importante encontro profesional de carácter autonómico se celebre no concello ourensán do **Carballiño**, que congregará a un cento de psicólogos e psicólogas do ámbito da saúde.

Nestas Xornadas, que levan por título "**Das vellas tecnoloxías ás tecnoloxías emerxentes; a dixitalización das contornas e das relacións**" tentarase reflexionar sobre o impacto tanto na sociedade en xeral como na propia práctica clínica. O venres 23 e o sábado 24 haberá oportunidade de debater sobre o impacto da intervención terapéutica online, das aplicacións tecnolóxicas que se están a empregar no eido psicolóxico ou preocupacións tan en auxe como as adicións sen substancia ás tecnoloxías.

O **Concello do Carballiño** e mais o **Casino** desta mesma localidade son entidades colaboradoras das Xornadas, que contan co aval da **Asociación Salud Digital** e que teñen o recoñecemento de formación continuada do Sistema Nacional de Saúde. O comité organizador está integrado por José Manuel Fariñas Darriba e Marina Ortega Otero, mentres que forman parte do comité científico desta edición José Manuel González González, Ana López Durán e José Eduardo Rodríguez Otero.

O presidente da Asociación Salud Digital, **Jaime del Barrio Seoane**, médico e actualmente *senior advisor* na área de "Healthcare & Life Sciences" de Ernst & Young, será o encargado de ofrecer a conferencia inaugural o venres 23, que leva por nome "A xestión da saúde nun click: mapas da era dixital, evolución, situación actual e perspectivas". A seguir, será o momento da análise da terapia online, coa experiencia da psicóloga clínica **Mar Aparicio Sanz** e do médico psiquiatra **Óscar Fernández Torre**, de Cantabria, mentres que a avogada **Cecilia Barros Díaz** exporá os aspectos xurídicos e deontolóxicos do uso de novas tecnoloxías na práctica psicolóxica.

Xa na tarde do venres exporanse dúas caras opostas do impacto tecnolóxico na vida das persoas. Por unha banda, a psicóloga de FEAFES Galicia - Ourense, **Patricia Gómez Salgado**, reflexionará sobre como estas ferramentas poden favorecer a dinamización e a integración; mentres que o psiquiatra da Unidade de Condutas Adictivas de Ourense **Gerardo Flórez Menéndez** tratará o abuso do tecnolóxico.

Pechará a xornada do venres unha mesa sobre as potencialidades comunicativas que ofrecen as TIC. O psicólogo clínico **Xacobe Abel Fernández García** exporá a súa experiencia na moderación dun grupo nas redes sociais para a dinamización profesional, mentres que a

psicóloga **María José Fares Varela** e experta en xerontoloxía tratará sobre a fenda dixital e como superala.

Na xornada do sábado será a quenda de aplicacións tecnolóxicas: "e-Motional Training" para o tratamento e a rehabilitación do funcionamento cognitivo será exposto polo psiquiatra **Alexandre García Caballero**, do Complexo Hospitalario de Ourense; mentres que **Lucía Maneiro Santamaría** e **Rafael Tourón Estévez** reflexionarán sobre as posibilidades da realidade virtual aumentada para a resolución de dificultades como creadores do software PsicoVR.

O peche destas xornadas correrá por conta de **Ana Calero Elvira**, doutora en Psicoloxía e directora da Clínica Universitaria do Centro de Psicoloxía Aplicada da Universidad Autónoma de Madrid, que presentará a conferencia titulada "O impacto das tecnoloxías emerxentes na atención psicolóxica: reflexións e consideracións desde 'o tradicional'".

Tamén haberá oportunidade para actividades internas da Sección de Psicoloxía e Saúde, como a presentación do *Anuario de Psicoloxía e Saúde*, unha publicación que chega ao seu décimo primeiro número e que nesta ocasión se centra no humor. Tamén se presentarán as comunicacións libres e pósteres que poden ser remitidas polos colexiados e colexiadas nas que se trate calquera temática relacionada coa psicoloxía clínica ou da saúde. As mellores, tanto en formato oral como escrito, recibirán un bono formación da Sección de Psicoloxía e Saúde por valor de 200 euros, ademais de publicarse no vindeiro número do *Anuario de Psicoloxía e Saúde* de 2019.

As Xornadas da Sección de Psicoloxía e Saúde son o encontro científico de maior antigüidade organizado polo COPG, desde as primeiras celebradas en 1996, que buscan promover o intercambio de experiencias e coñecementos desta área entre o colectivo profesional da psicoloxía e da saúde, así como promover a actualización científico-técnica en materias específicas. Esta iniciativa impulsada polo COPG está recoñecida como unha Actividade de Interese Sanitario por parte da Consellaría de Sanidade da Xunta de Galicia. Vai dirixida a psicólogas e psicólogos colexiados; estudantes de psicoloxía e outros/as profesionais interesados na temática a tratar.

Se desexan solicitar entrevistas para ampliar a información, contacten co departamento de comunicación do Colexio Oficial de Psicoloxía de Galicia:

Eliana Martíns: 981 534 049 / 699 908 968 / comunicacion@copgalicia.gal